

Raafu ingi réenjo awunkulo

Lentaarenj mara Saŋ, utaalibehu Yensa,
f'alaamerne afég bífegereno.

Díino ajellihinemjellihin h'adékehne buyiko
a duniyaŋo.

Ajellihinem ni Yensa, aji aŋoolinti a
duniyaŋo, guliiho, akengunkuneh moŋon
moŋon m'afiyumemne.

Anékineeniŋ arinenj awunkulonj.

Angu, Yensa aŋoolinekinah a duniyaŋo ingi
moŋon moŋon m'afiyumemne k'aguy
umaasahu duniyaŋo nip.

Amaraháneh duniyaŋo buruhu díinenj wuuli.

Díinenjo wuuliyenjo awusunadir, Yensa
afanánaháneh Iblisa k'aworom a kuulo

kúndenno.

Díino afak ajellihin Saŋ alikiyaama.

A waato nómár Yensa akengunkuneh
moŋon moŋon mu fiyundomne.

Anwonnháneh a jannoku Díino, Díino
n'anoone a bunoohumo búdenno bufero,
k'ankiti ingi Díino.

Ankitihineh a gubaarhu hójondoŋo
h'ankanne a duniyaŋo ki Díino aworeeniŋ a
kuulo kúndenno.

Saŋ añañaañ mara...

Mi harethánin guyroŋne a líibárho
kanjébo immerenŋ nip anworaane a
kuulo kúmmár. (Rev. 20:15)

Angu, Saŋ aféfeg a bífegereno mara mi
harethánin guyroŋne a líibárho kanjébo,

immeren̄ nip anworaane a kuulo kúndenno.

Baworeenī a kuulo, Díino ajóonin raafó
ingi réen̄o awunkulo.

Angu, mōjon mōjon mu gurethinem
añaañaañe a líibárh̄u kanjébo, jamāño
m'anfiyumne Yensa, immeren̄ nip
anguyhuneh a duniyāño awunkulo ingi
Yensa baman dagurumaaren̄.

Jantenten̄ ho Sāñ afégne.

Sāñ ayéji:

¹ Afúrumi na, ífeg raaf awunkul ingi
réen̄ awunkul no míiden̄en̄ne ingi no
famo. Agida fankaaso fāño yikiren̄.
Fégen̄ bāñ, raafó ingi réen̄o no famo
aniimniim met. Adoonadoona
bandór. Adékiidek ífeg bukooro

burenninno, b'aretuhne Jerusalem
n'afúruntohone imbi Díino arijaana
akucuroh. Kanda ajónjoon! Ajónjoon
ininkaman maaño n'aribaa ba búfeku
údiigenkinem, maŋ nim gajónne
fanfaŋ. ³ Kanda fo bukooro
burenninno aŋayrine jankuco
káriman arijaana iyennehin burig
búde b'afúrumor maŋ bim a
bunoohunku Díino ayéj:

*Ningen baŋ! Afúrumdi na, Díino ba
buguy kantíg ínkánduk ingi
jamankáanam. Díino fankáanam
aguyhunehe na ingi jamankáanam.
Immereŋ damankánin
anguyhunehe na. ⁴ Díino fankáanam
amunkirikineh moŋon moŋon
munkulhunom. Úpájuli, na wúur*

*daniirohar, wúur dahoonahar, wúur
dayohahar. Angu hómáránj nip
n'akoom bandór.*

Nim galóbne káriman a bunoohungu
Díino a raafó. ⁵ Balóbi nim Díino
n'anoone a bunoohumo bu
umaasano anoyindeem ayéj:

- Ingah! Me ba bújooninku
honjoroŋo nip gídekehne k'aguy
duniya awunkul.

(Rev. 21:1-5)

Angu, Díino akoomunkuneh duniyaŋo inno
k'ajóonin duniya awunkul.

San ayennennehin Díino n'ayéjne:

- Ingah ! Me ba bújooninku honjoroŋo nip
gídekehne k'aguy duniya awunkul.

A bífegerenkinem, Saṇ aféfég duniyaṇo
nómár, duniyaṇo awunkulo

Ayéji :

Afúrumi na, ífég raaf awunkul ingi réeṇ
awunkul no mídeṇeṇe ingi no famo.

Angu, duniyaṇo awunkulo no Díino
ajóoninkinehne, neeraṇ gamíirhinehne?

Guliiho, duniyaṇo awunkulo ajónkáneh
fanfaṇ !

A duniyaṇo awunkulo ayikhineh bukoor
buwunkul b'aretuh «Jerusalem awunkulo.»

Bukooro búmár ajónkáneh dáde.

Jantenteṇ ho Saṇ afégne.

Ayéji :

Adékiidek ífeg bukooro burenninno,
b'aretuhne Jerusalem n'afúruntohone
imbi Díino arianna akucuroh. Kanda
ajónjoon ! Ajónjoon ininkaman
maañño n'aribaa ba búfeku
údiigenkinem, maŋ nim gajónne
fanfaŋ.

Aji údeki bajaho, guliiho dúfeg maaññoŋo.

Maaññoŋo, beeran gadékne?

Adékdek a saloŋo k'adeɸiyaa, ki indikaamo
ankaan k'ajóon dáde.

Angu, maaññoŋo, gapútri a bajaho, jamaŋo
nip andankhánam n'ajóon k'anyéj : «A,
maaññoŋo ajónjoon foo!»

Angu Saŋ, bafégi duniyaŋo awunkulo,
bafégi Jerusalem awunkulo ayéji : «A,

ajónjoon foo ! Ajónjoon ininkaman maaño
n'aribaa ba búfeku údiigenkinem, maŋ nim
gajónne fanfaŋ.»

Gunakinno, duniyaŋo awunkulo no Díino
ajóoninkinehne aguyhuneŋ kantígo ka Díino
aguyhunehne ingi jamankánam.

San, bafégi Jerusalem awunkulo, ayennehin
burig búde b'ayéjeh :

Ningenŋ baŋ ! Afúrumdi na, Díino ba
buguy kantíg ínkánduk ingi
jamankánam. Díino fankánam
aguyhunehne na ingi jamankánam.
Immerenŋ damankánin
anguyhunehne na. (Rev. 21:3)

Angu, a waato inno, Díino inno bim
arijanna.

Dimpirenoŋ k'ínfegomon

Kanda a duniyaŋo awunkulo no Díino
ajóoninkinehne, Díino aguyhuneŋ ingi
jamaŋo.

Úfekineŋ Díino !

Úfekineŋ Yensa n'anoone a
bunoohunkunom n'amarahne duniyaŋo
awunkulo.

Yensa aguyhuneŋ ingi jamankánam, jamaŋo
m'anfiyumemne.

Aguyhuneŋ ingi immerenŋ ki immerenŋ
anguyhuneŋ ingi úmár bandór.

Lentaarenŋ ho Yensa atéekinne
ñantaalibehinem jandiŋ banirom.

Ayéjeeniŋ :

Inini ninkinan, waanintɛŋ ilaahánan.
Fiyintɛŋ Díino k'uŋoolinɛŋ
ufiyumeemuŋ. ² Inini, díku Bááhum
afufuuh dáde. Ídekhineh ídek
íjoonindoonuŋ kannokánan. Aji
hómár yikireŋɛr díloboonuŋ. ³ Inini,
túyoreŋ k'ídek íjooninditoonuŋ
kannokánan k'injooliner ídek
idoohoonuŋ ba bim k'inguyon kantíg
ínkánduk. (Jn. 14:1-3)

Aji ufiyumeŋ Yensa, a waato inno, Yensa
bújooninku kannokánan gaŋane.

Kannokánan, kámár ingine Jerusalem
awunkulo.

Kannokánan, kámár ingine duniyaŋo
awunkulo no Díino ajóoninkinehne.

Angu, ayikhineh bísiba, Yensa

anoolinekineh.

Anékuno arino awunkulo k'uguy a duniyaŋo
awunkulo ingi Yensa bandór.

A duniyaŋo nómár awunkulo, jihoonjo daguy
na.

San ayennennehin síngiiró n'ayéjeh :

⁴ Díino fankánam amunkirikineh
monon monon munkulhunom.

Úpájuli, na wúur daniirohar, wúur
dahoonahar, wúur dayohahar. Angu
hómáráŋ nip n'akoom bandór.

A duniyaŋo inno, jihoonjo jup agune na.

Jamaŋo ganhoonjohoonj a gubaarhu kuyoho,

A gubaarhu banuyonjo

A duniyaŋo inno banéro alabalaba.

Anuynuy dáde.

Angu jamaño ganhoonjohoon.

Anfak anhoonjoh a gubaarhu biniironjo.

Kanda a duniyaño awunkulo no Díino
ajóoninkinehne, Díino fankánam
amunkirikineh mojon mojon
munkulhunom.

A duniyaño nómar awunkulo, jamaño
danhoonj mara a duniyaño nómar banuyon
dayik, biñaam dayik, banér dayik, biniiro
dayik.

San ayennennehin síngiirro s'ayéjehne:

Úpájuli, na wúur daniirohar, wúur
dahoonaahar, wúur dayohahar. Angu
hómáráń nip n'akoom bandór.

Jamaño m'angune a duniyaño nómar

awunkulo anyikhineh arineṅ awunkulon.

Arineṅo nómáráṅ danér, danuy, daniiro.

Faka, a duniyaṅo nómár, jínubonjo,
hójondonjo daguy na.

Iblisa ingi fáguhonjo danguy na.

Wúur datem údinhinem.

Jamaṅo dandanka índukonjo.

Kenkaarenjo dayik a duniyaṅo nómár.

Hódugo dayik

Buyaku bakodiṅo dayik.

Simbujayo dayik.

Biñaamo dayik.

Básuumo bareṅ aguyhunekne a duniyaṅo
bandór.

Ñanñaamolo, agi anramay anyéji : «
Básuumo. »

Kanda a duniyaŋo inno, básuumo gireŋ na.

Kanda a duniyaŋo awunkulo no Díino
ajóoninkinehne, básuumo bareŋ aguyhuneŋ
na baman dagurumaareŋ.

Yensa aguyhuneŋ umaasahu duniyaŋo
nómár

Aguyhuneŋ umaasa újooni k'amara
duniyaŋo nip baman dagurumaareŋ.

Jantenteŋ ho Saŋ afak afégne a
bífegerenkinem.

Jantenteŋ Gúloku Díino :

⁵ Balóbi nim Díino n'anoone a
bunoohumo bu umaasajo
anoyindeem ayéj:

- Ingah! Me ba bújooninku
honjorojo nip gídekehne k'aguy
duniya awunkul.

Akir ayéjeem:

- Inini, h'éfuruntne bujellihinken,
maṇ marigen. Ñaañar nip kuku
ufiyumeem.

Nim Díino ayéjeemne. ⁶ Abocin
ayéjeem:

- Adédet angu. Me igune kankirumo
ingi kándetumo. Wúuro mu baaru
alahne adéker a binaam k'íneerem
baaru b'abuturohne arukoh,

b'anéerumehne kanjébo. Ingah!

Bacaam gireŋ na! Bunah. (Rev. 21:5-6)

Yensa ayéji, «Me igune kankirumo ingi kándetumo.»

A kankirumo, Yensa ummo na.

A waato no Díino ayabne duniyaŋo, Yensa ummo na.

Jandiŋ waato no Díino ayabne duniyaŋo, Yensa ummo na.

Lentaarenŋ ho Saŋ añaañne a Injilhinem a gubaarhu Yensa.

Ayéji.

M'ayéjuhne Gúloku Díino.

M'ayéjuhne Gúloku Díino úmár ummo bim ingi Díino káriman fam.

Faka úmár agune Díino. ² Úmár aguyguy káriman fam ingi Díino fo Díino atonje kayabhu duniyaño guliguliiho. ³ Hoñon hoñon ho Díino ayabne úmár ummo na. Yikireñ ho Díino ayab ni úmár toháronj. (John 1:1-3)

Angu, a kankirumo, Yensa ummo na.

Kándetumo mees, Yensa aguyhuneñ na.

Yensa ajóoninkineñ duniyaño awunkulo k'aguy umaasahu duniyaño nómar baman dagurumaarenj.

Angu, Yensa asíibáásiib ki jamaño anfiyumem k'anéereeniñ kanjébo ka bandór.

Asíibáásiib ki moñon moñon m'afiyumemne

aguy ingi úmár a duniyaŋo awunkulo
baman dagurumaarenj.

A bífegereno, Saŋ ayennennehin Yensa
n'ayéjehne :

Wúuro mu baaru alahne adéker a binaam
k'íneerem baaru b'abuturohne arukoh,
b'anéerumehne kanjébo. Ingah ! Bacaam
girenj na ! Bunah.

Úfegenj, Yensa funaare galóbumohne.
Nanka, Yensa gira alóboh a gubaarhu
baaruŋo b'afúruntohne a robinenjo. Gira
alóboh a gubaarhu baaruŋo b'andíinintehne
a koloŋo. Yensa a gubaarhu kanjébo ka
bandór galóbumohne. Baaruŋo bámár
ingine kanjébo ka Yensa anéerehne jamaŋo,
kanjébo ka bandór.

Yensa asíibáásiib k'uruuh baaruŋo bámár.

Anékuno baaruṅo búmár aji ufiyumem.

Anékuno kanjébo ka bandór aji ufiyumem bareṅ.

Bacaam gireṅ na! Bunah.

Yensa acaamcaam nip f'aniirone a halihano.

Bacaamo ingine muhenkinem m'ahupaane.

Muhenku Yensa, biniirohu Yensa acaamcaam jínubonkon nip ki Díino apiren akafari jínubonkon, ki Díino apiren anéero kanjébo ka bandór.

Angu, ñantaaro ucaam, uñantay ufiyum bareṅ.

Aji ufiyumi Yensa, Yensa anékuno baaruṅo bámár.

Urukuneh baaruṅo bámar.

Uyikhineh kanjébo.

Kanjébo k'afúruntné imbi Díino.

Kanjébo ka bandór.

Faka, ayikhineh bísiba, Yensa anékuno
arino awunkulo.

Arino nómár daniirohar.

Angu, újebhineh bandór a duniyaṅo
awunkulo no Yensa ajóoninkinehne baman
dagurumaarenḡ.

Jantentenḡ faka ho Saṅ ayennehinne a
bífegerenkinem.

⁶ Angu maleekaṅo ayéjeem:

- Féḡ baṅ! Kuku ufiyum h'ófegne ingi
h'oyennehinne nip mara maṅ

marigen. Féḡ baṇ, Díino Umuyhintor,
ámár gajellihinehne *anabiyonḡo
n'anñantane antéekin jamaṇo. Angu
maṇ ámar abúuñurne
maleekahánam ba bujellihinku
ñandóolhánom a nintiku h'adékehne
buyiko. Te damiñ adék ayikhineh.

Nim maleekaṇo ayéjeemne. ⁷ Balóbi
nim mees Yensa ayéj:

- Ingah! Manini k'íputor.

Ugurumaarenḡ akanne jamméejhinem
a líibáro inno k'afak abúuña hóbun
h'agune na, úmár ayikhineh básuum
a hafithinem ingi barake.

Nim Yensa alóbne.

⁸ Inini, me Saṇ, m'éfegne, me
iyennehinne h'etifuroonunḡe nip.

Biyennehini hómár ífeg hómár f'adék
adét, inoya baman a réenjo imbi
maleekaño ba buramunkánamer.

⁹ Kanda bídeki ba bukaano nim
maleekaño ayéjeem:

- Ingah! Dahu ukaan nim de! Mintor
ingi índoonenenken *anabiyonjo
ingi m'ambúuñahne líbáro inno,
mintor nip ñandóoluku Díino.

Ramunt Díino! ¹⁰ Ingah! Úfefeg
h'adékehne buyiko k'uñaañ hómár
nip a líbáro. Inini, dahu usutura
h'oñaañne na. Jellihint jamaño nip
h'ayikhinehne, mara damiñ ki hómár
ayik.

Nim maleekaño ayéjeemne. (Rev.
22:6-10)

Angu maleekaŋo síibiira ki Saŋ asutura ho
Díino ajellihinemne.

Gúmár akanne Saŋ añañaañ hoŋon hoŋon
h'afégne ingi hoŋon hoŋon ho Díino
atéekinemne a líibáro.

Líibáro nómár ingine líibáro abiyaamo a
Líibárho Gúloku Díino.

Díino síibiira ki hómár asuturahaa imbi
ñanñaamolo.

Gúmár akanne ifasarimiŋ Líibárho Gúloku
Díino ingi guñaamolo ki ninkinan
ñanñaamolo úpájulán ho Díino atéekinne
jamaŋo a líibáro nómár.

Asíibáásiib k'úpájálán ho Díino akanne ingi
h'adékehne bukaano.

Asíibáásiib k'úpájálán nip !

Biriman f'ayabne duniyaŋo baman
d'ajóoninkinehne duniyaŋo awunkulo,
asíibáásiib k'úpájálán̄ níp.

Kanda afaŋi tu, Díino asíibáásiib k'úpájálán̄
h'akanne k'apiren apahunó, k'apiren
anéero kanjébo ka bandór.

Angu Saŋ, a bífegerenkinem afak ayennehin
síngiirhu Yensa.

Yensa ayéjem.

¹⁶ Ingah! Me Yensa, me íbuuñne
maleekahum a binanan k'adék
aséediya hómárán̄ níp a dayra noŋon
noŋon. Me a muhenku Umaasaŋo
Dawuda gífuruntne. Me inoone a
bunoohunkunom angu. Me igune

gúhuuro g'ayaarínkinehne
hareennaamo.

Nim Yensa alóbne. ¹⁷ Angu balóbi
nim mees iyennehin ni Jamméejhu
Díino ingi Maañoŋo anyéjehne:
Yensa, dókulo! Moŋon moŋon
ayennehinne kúmbuuñanku líibáro
inno, úmár mees añantay adék ayéj
jamaŋo: Dókuloŋ! Moŋon moŋon
baaru alahne adéker k'aruuh
baaruŋo b'anéerumehne kanjébo.
Dókulo k'uruuh, te ducaam.

Nim Jamméejhu Díino ingi Maañoŋo
ganyéjehne.

(Rev. 22:16-17)

Fo Yensa alóbne a gubaarhu Maañoŋo, alób
a gubaarhu jamaŋo m'anfiyumemne.

Jamaño m'anfiyumne Yensa anretaa,
«Maañoño.»

Yensa areteeniñ Maañoño mara
apokunpokun moñoñ moñoñ m'afiyumemne
mañ ni údiigeeno apokunne maañoñohunom.

Mañ ni údiigeeno aparehinehne kantígo ka
maañoño aguyhunekne, mañ nim Yensa
añane bukaano.

Bújooninku kantígo ka maañoño
aguyhunekne gañane.

Kantígo kámár ingine duniyaño awunkulo.

Yensa asíbáásiib k'uguy ingi úmár a
kantígo kámár kanjóonino baman
dagurumaarenj.

Angu Yensa ingi Jamméejhu Díino
Jarenninno ingi moñoñ moñoñ m'afiyumne

Yensa anlób k'anyéjoonuj :

Dókulon ! Monon monon baaru
alahne adéker k'aruuh baaruj
b'anéerumehne kanjébo. Dókulo
k'uruuh, te ducaam.

Nim Jamméejhu Díino ingi Maañojo
ganyéjehne. (Re. 22:17)

Jantenten ho San afak añaañne.

Adétilinkineh liibárhinem ingi butenga.

¹⁸ Angu me San butengahánan
ginane. Líbáro inno
n'eñaañutoonujne a nintiku
h'adékehne buyiko, anafanafá dáde.
Dahi wúur abecin h'agune na.
Monon monon abecinne h'agune na,
Díino ayehenkinem buyehen bu

líibáro inno alóbumne. ¹⁹ Faka dahi
wúur ataahul kúmbuuñaamo unku a
nintiku honjoroŋo h'adékehne
buyiko. Moŋon moŋon ataahulne
k'afúnn h'agune a líibáro inno, Díino
ba butaahul gukibhinem a nintiku
sinohu kanjébo. Wúuro úmár danŋan
a bukooro burenninno. Hómár
gitengahoonuŋne.

(Rev. 22:18-19)

Angu Saŋ adétálin detálin liibárhinem ingi
butenga.

Ayéji mara wúur ñantaaraŋ abecin, ingi,
ñantaaraŋ ataahul h'ayikne a Líibárho
Gúloku Díino.

Ho Saŋ añaañne ingine Gúloku Díino.

Ho Saŋ añaañne ingine líibáro abiyaamo a
Líibárhú Gúloku Díino.

N'agune líibáro abiyaamo, wúur ñantaaraŋ
abecin h'agune na.

Ayéji :

Dahi wúur abecin h'agune na.

Moŋon moŋon abecinne h'agune na,

Díino ayehenkinem buyehen bu

líibáro inno alóbumne. (Rev. 22:18)

Inini, Líibárhú Gúloku Díino adédet.

Díino atéekinteeŋ mintor hoŋon hoŋon

h'asíibane k'ímpájuloŋ biriman waato

n'ayabne duniyaŋo baman waato

n'ajóoninkinehne duniyaŋo awunkulo.

Díino atéekinteeŋ mintor hoŋon hoŋon

h'asíibane k'ímpájuloŋ a gubaarhu h'akanne

k'apiren apahun mintor a jínubonkintor
k'impirenoŋ inyikoŋ kanjébo ka bandór,
k'impirenoŋ inguyoŋ ingi Díino bandór a
duniyaŋo awunkulo.

Yikireŋ honj ho Díino asíibane k'abecin a
líibáro inno.

Angu Saŋ atengatenga jamaŋo mara
ñantaaraŋaŋ ambecin honj a líibáro no
Díino anéerne mintor, Líibárho Gúloku
Díino.

Angu Saŋ adétálin detálin liibárhinem,
adétálin detálin Líibárho Gúloku Díino ingi
halóbo inha.

²⁰ (Afúrumi na Saŋ abocin ayéj,)

Inini, m'aséediyane honjoroŋo
h'eñaañne nip ayéj:

- Marigen! Damiñ k'íputor!

Nim Yensa alóbne.

Amini! Díin akaan ki hómár ayik!

Dókulo Umuyhintor Yensa!

²¹ Díin akaan kabonkero

k'afúruntohone imbi Umuyhintor

Yensa aguy a binanan.

Nanka líibáro inno amukne.

(Rev. 22:20-21)

Angu, na Líibárho Gúloku Díino amukne.

A líibáro inno, Díino atéekinteekekin mintor
hojon hojon h'inñantahone ímpájálon a
gubaarhu ámár Díino.

Atéekinteekekin mintor hojon hojon
h'inñantahone ímpájálon a gubaarhu ho

Díino akanne ingi ho Díino adékehne
bukaano.

Guliguliiho, Díino ayabyab duniya ajóoni.

Ayabyab ñanraagofonjo k'anguy a duniyaŋo
nómár ki biñankayo aguy bájeginenku
ñanraagofonjo ingi Díino.

Kanda Adama ingi Hawa ankankaan ho
Díino adígumne.

Inini, n'ankanne hójondonjo, biñankayo
bájeginenku ñanraagofonjo ingi Díino
alekaa.

N'ankanne hójondonjo, Díino añantay
ayeheneeniŋ.

Inini, ñanraagofonjo anniirohuneŋ.

N'inkaanoŋne hójondoŋo, n'inyikoŋne
jínubonoŋ, abári ki Díino ayehen mintor.

Angu, buyeheno búmár ingine biniironoŋ.

Biniironoŋ a duniyaŋo ingi biniironoŋ bandór
jahánama.

Kanda Díino akankaan honj k'apiren
apahun mintor.

Díino faŋo adékridek a duniyaŋo k'aguy
uraagof.

Yensa, Úbáku Díino adékridek a duniyaŋo
k'aniiro a halihano.

Ahuphup muhenkinem k'acaam
jínubonkintor.

Aniironiiro buruhu mintor ki Díino apiren
akafari jínubonkintor.

Baniroy mees, bísibaño bilallinno akeng a
biniirono k'ajéb.

Aṅoolin arijaana k'aguy imbi Báábám Díino.

Inini, ni Yensa aniirone k'acaam
jínubonkintor, inini moṅon moṅon
m'afiyumne Yensa, Díino akafarihineh
jínubonkunom.

Angu, ayikhineh bísiba, Yensa
aṅoolinekinah a duniyaño.

A waato nómár, Yensa akengunkuneh a
biniirono jamaño nip m'anfiyumemne.

Yensa anékinneeniṅ arineño awunkuloño no
daniiroharne.

Yensa afak akengunkuneh jamaño nip mi
fiyumdomne.

Immereṅ nip ankitihineh imbi Díino.

Angu, bísibaŋo bímár, moŋon moŋon mu
gurethinem guyroŋne a líibárhu kanjébo,
immerenŋ nip anworaane jahánama.

Kanda moŋon moŋon mu gurethinem agune
a líibárhu kanjébo, immerenŋ nip
anguyhuneŋ bandór ingi Yensa a duniya
awunkul, duniya ajóoni.

A duniyaŋo nómár :

wúur daniirohar, wúur dahoonŋahar, wúur
dayohahar.

Aji marigeno, ufiyumfiyum Yensa,
uguyhuneŋ na bandór.

Kanda aji fanti bufiyum Yensa, jantenti
faka ho Gúloku Díino ayéjne.

Díino ayéji :

Dókulon ! Monon monon baaru
alahne adéker k'aruuh baaruno
b'anéerumehne kanjébo. Dókulo
k'uruuh, te ducaam. (Rev. 22:17)

Fiyunti Yensa

Aji ufiyumi Yensa, Díino akafarihineh
jínubonkon nip.

Anékuno kanjébo ka bandór.

Aji ufiyumi Yensa, Díino aguyhunek
bááhán.

Jamméejhu Díino Jarenninno aguyhunek a
hafithen k'upiren ukaan h'asúumhánehne
Díino

Yensa aguyhunek Umuyhon.

Angu, ayikhineh bísiba, Yensa
aṇoolinekinah a duniyano.

Anékuno arino awunkulo.

Ajóoninkineh duniya awunkul, duniya
ajóoni.

Angu, uguyhune ingi Yensa a duniyaŋo
nómár baman dagurumaaren.

Angu, inramunoŋ Díino dáde.

Inramunoŋ Díino a gubaarhu h'atéekinne
mintor a líbáro n'anéerne mintor, Líbáarhu
Gúloku Díino.

Inramunoŋ Díino a gubaarhu h'akanne
k'apiren apahun mintor.

Angu na gúlokum amukne.